

## **Kaiwo Anatu Bo Reantenang Na Paulusi We Jemati Na Tesalonika**

### *Kaiwo dedung we 1 Tesalonika*

Bendari Tesalonika, fafongfa mani, andino webendari fuba we nu Makedonia foi ne, tuti kataio mano na parenta Roma foi eminohi nai we eru nu Makedonia foi sentenang. Tarahio ne inontarai enayai nai fosa ewe-200.000 rai. Maneiru eweYahudi wape ne fiaufoi mani inontarai Yahudi kaha saine, amani mano esomi we aririwang tuti seng wetarai kaha.

Na bendari Filipi Paulusi, Silasi, tuti Timotiusi itorontai to Tesalonika tuti na wanai itowuwu Kaiwo Mahikai fo wesa ampefe maneiru teai eroaso Yesusi (Rasuli 17:1-9). Wape waroi ahang kahai mae Paulusi itosobu dadira ria Yahudifosa tuti inontaraio eroaso kaha fosa, enari kanggani sitoru. Ampefe mano eroaso fosa etanatu sitoru to katai siai bei aha (Rasuli 17:10).

Wape Paulusi enerorong we detisa aha weo enemamea wesa paria, dohonao eroasofo tupa dawohi fe. De dontai wesa wape fi weduari, ampefe demi Timotiusi dontai to Tesalonika aha we suambawasa (1 Tes. 3:1-2). Mayeai Timotiusi daraberahi, kia kaiwo karirisa we Paulusi aha, deisaharai we mano eroasoai na Tesalonika fosa esodai dadira ria kaiwasa siai fosa we eraria Yesusi fefe. Tonanai ki wape ene eroasofo mutubarufu rai. Ampefe Paulusi soi kaiwo anatu nini

we ambori ewaitawang todoni mirising karirisa, todoni arosa, tuti enerorong dohong we detisa aha.

Inontarai Tesalonika fosa arahio eroaso Yesusi ampefe Paulusi soi kontai kariri todoni eminohi toa fo weo eweinontarai Kristeni fefe (4:1-12). Eserawaweraha kontai kariri fianai aino mano emarareha fosa esobua fo, amani Yesusi daraberahi kaharai, ambori eworu ete esuwi aha kontai ki. Ampefe soi kontai kariri rahidao Seng Yesusi daraberahi ma foi tuti rahida mansuwi-suwi foi (4:13-5:11).

**Kaiwo na suratinei deto kutuai toninai:**

1:1–3:13 Kaiwo kariri Paulusi tuti inontarai Tesalonika mano eroaso Kristusi fosa.

1:1-10 Paulusi dohong mahikai we Allai we inontarai Tesalonika fosa eroasoia mutu fefe.

2:1-12 Paulusi soi kariri minohi toa fo na mai, na rahida minohi rahansa fo.

2:13–3:13 Paulusi soi kariri yurai paria we deti euremifo aha.

4:1–5:28 Paulusi ne aunau dohonai wesa fo.

4:1-12 Fi kariri todoni inontarai Kristeni fosa eminohi toa fo.

4:13–5:11 Aunau kariri mansuwi-suwifo tuti rahida Seng Yesusi daraberahi nai ma foi.

5:12-22 Kaiwo aunau kariri todoni mano eroaso fosa eweboyarifo.

5:23-28 Kaiwo kafe.

*Mahikaifeai*

<sup>1</sup> Weo doroi mea na jemati Tesalonika, amani inontarao mesomi we Dai Allai tuti Seng Yesus Kristusi wa mea.

Kaiwo anatu ninai na antoru, amani yau Paulusi, Silasi tuti Timotiusi. Antoene-mitawanaifa kadono Allai dohong ne bengfo arora we mea tuti dohong mea menumiruainso ne maifo.

*Paulusi itofiai Allai we jemati Tesalonika fosa ene eroasoqfo*

<sup>2-3</sup> Antorohong mahikai we Allai we mea kiai. Na rahida neungne antoaromi mea kiai na antone nadi rorong ne. Antowenadi we tane Dai Allai mani, antorutang tuti mea pampang. Weo antoaromioai pampang kariri todoni metainawiai na metohong toa wa we meroaso Kristusifo, tuti todoni menari fiani kontai weo mefata inontarai siai fo, weo menemiwawusa fefe. Kontai antoaromioai kariri todoni metawang meara mutu we menemitawang tane Seng Yesus Kristusi we ambori daraberahi aha ma fo.

<sup>4</sup> Doroi meaine, Allai enewawu mea. Antowaitawanaifa weo Allai diri mea tuti sahu mea we ne inontarai ampa. <sup>5</sup> Antowaitawang tonanai weo wiro na kaiwoariri arora antowuwu Kaiwo Mahikai fo we mea kaha, mae antowuwuai na Allai Nuaninufoi ne mambiriufu, tuti kaiwo nanai antoroasoai tarai na antoenemirorongne. Finanai mewaitawanaifa ampa, weo mewati terai kariri antorohong toa ne tuti kariri fianai aino antonari we mea na rahida antonai rahang mea nanai. <sup>6</sup> Kontai metohong kariri antorohong toa ne ampa, tuti kariri Seng Yesusi dohong toa fo ampa. Donio mesodai dadira bitoya tonanai ki, wape Allai Nuaninunei dohong mea memararing we metohong kariri ne Kaiwo antoraiririai we

mea fo. <sup>7</sup> Na tonanane, mewekasinai we inontarai eroasoai fubao enai na nu Makedonia foi sentenang tuti na nu Akhaya foi, amani ewati mea tonanafo, ewaitawanai we todoni eroasofo. <sup>8</sup> Weo na fianai aino menari nanai, wedaya kaiwasa bitoya na nu Makedoniai foi tuti na nu Akhaya foi etaramio Kaiwo Mahikai fo kariri Kristusi. Nanai tera kaha, mae kaiwoariri kariri todoni meroaso Allaifo dafai wariai kawuru to katai doni kontai. Ampafe na doni kontai antorafo, wiro antomadu fieai kariri mea we kaiwasa nanisa ahang kaha, <sup>9</sup> weo kaiwasa antoraosa nanisa kiai emaduraia fuba kariri todoni metamang we antoru na maifo, na rahida antora we mea mau nani. Emadu kariri todoni metawing aririwangno raminde mesomi wesa we mene sengfo, mae mera we Seng Allai, mano wetarai tuti mireha na wea kaha foi, we mesomi wei fo. <sup>10</sup> Emadurai kontai kariri todoni metamang we Yesusi we daraberahi na rorafaisi aha ma fo. Amani Yesusi Allai ne Kaisungno duwiri na marareha rorong foi kawuru fo. Yesusi nani dino feriri tata weru aibo ambori tasodairi ria Seng Allai fo.

## 2

*Paulusi soi kariri fi niari na bendari Tesalonika fo*

<sup>1</sup> Doroi meaine, mantaung mea mewaitawanai ampa, weo rahida antorontai we mea mau antorufi we mea wai nani, fi antoru fo wetarai fuba pari ampa. <sup>2</sup> Mewaitawanaifa weo wiro antorontai we mea to bendari Tesalonika kaharai

mae, kaiwasa na bendari Filipi fosa enari kanggani tuti etei kanggani antorua. Antosodai ne tonanafo ki, wape Allai fiata antoru donio na dadira rorongno kaiwasa enari we antoru fo kontaio antowemambiriu we antowuwu ne Kaiwo Mahikai fo we mea. <sup>3</sup> Weo kaiwo antorurai antomadurai we meroasoai nanai, wiro fi sarawa fea kaha, tuti wiro antomadurai we ambori antosobu fi we antoru kaha, ete antorurai we antopampamu mea kaha. <sup>4</sup> Kontai antosera we kaiwasa ambori enemio antoru kaha. Wape antomadu kariri fianai aino Allai eneofo fo terai. Weo Allai deitawang taenemirorongfuisi tuti detio antomai na urengreafo we yoaso antoru we antowuwu ne Kaiwo Mahikai fo ampa. <sup>5</sup> Mantaung mea mewaitawanaifa ampa, weo wiro antoboromi wemereha we mea kaha, ete antoradiwa fieai na antoenemirongnei we mea kaha, amani fi toyari antosera we ra ete doi we antoru. Allai mantauni deitawang ne tonanane. <sup>6</sup> Tuti wiro antosera we inontarai etaparanding antoru kaha, nanafo wiro na mea ete inontarai siai. <sup>7</sup> Tarai, weo Kristusi ne rasuli di antoru, ampafe tofino antomai kontai we antorutang we fieai ria mea toyari doi ete fiang. Wape wiro antomaya we antowedayara mea mesobu maraba kaha. Rahida antonai rahang mea tonanaifa ne, antomanang we mea, antonari mea toyari wiwing manei niari sua ne arikangfoi na mai beyari. <sup>8</sup> Antoenemiwawu mea fuba paria, ampefe wiro antorairiri te Kaiwo Mahikai fo titou we mea kaha, mae na antoenemirorong mirising antomainenang we antonari fifiani kontai we antofata mea nayai. <sup>9</sup> Weo doroi meaine,

mearomioaifa nendai, kariri todoni antorufi pampang fo. Diru rahida antorurai mambiriu we antosobu fiang siai, na rahida antowuwu Kaiwo Mahikai na Allai we mea fo. Ambori wiro antowedayo mane wobu maraba we antoru fanai.

<sup>10</sup> Mewati terai, na rahida antonai rahang mano meroasoa wa mea, kariri todoni antoenemiro-rongnei mirarebanai, antomasi, tuti todoni antonari sarafia kaha fo. Allai deitawanai kontai. <sup>11</sup> Mewaitawanaifa todoni antonari sua mea to-yario wawa mang manei niari sua ne arikangfosa, <sup>12</sup> amani antoranggewa mea ambori menemiro-rongwai mitubaru, tuti antomadurai na tapapa we mea pampang ambori metohonafo mai kariri todoni Allai ne inontaraine tatohong toa fo, weo na tonanane Allai firaise we mea. Weo Allai sahu mea kawuru ampa, we meminohi na ne weMananu fo tuti na ne sambewarao dadai fo.

<sup>13</sup> Fi siaio wedaya antorohong mahikai we Allai pampang kontaifa ne mani, rahida antohorang Kaiwo Mahikai we mea fo metafu na mai paria, amani metafurai tarai we Allai ne Kaiwo Mahikai medura fine, wiro inontaraine amene kaiwo amemadura fine kaha. Kaiwo wetarai nanai wemambiriu na mano meroasoa ne menemirorongfuisi. <sup>14</sup> Doroi meaine, mene tarai kariri Allai ne jemati na nu Yudeao eroaso Kristus Yesusi fosa. Ea mani esodai dadira ria ene inontarai Yahudi siai fosa. Mea kontai tonanai, amani mesodai dadirafo ria inontarao mene nu boyari fosa we meroaso Yesusi fefe, ne tarai kariri Allai ne jemati na Yudea fosa we esodai dadirafo ria ene inontarai Yahudi fosa fo. <sup>15</sup> Inontarai Yahudi nani saino emung Seng Yesusi, tuti na fafongfa

emung nabifosa, kontai etata antoru weru ene kataifo. Mandoni kontai emamuna wei, tuti Allai wiro eneosa sobua kahaia. <sup>16</sup> Erurai we etamuna saya antoru, ambori wiro antowuwu kaiwo kariri todoni Allai feriri inontarai siai konta fo we Yahudi kaha fosa fanai. Ampafe ene enari tonana ne, wedaya enari sasari bitoya karerai ampa, paria wedaya Allai dohong aibo maraba paria wesa.

*Paulusi deisaharai todoni dawiai we dontai suambawa inontarai Tesalonika fosa nariai aha*

<sup>17</sup> Wape doroi bohiwa meaine, antohatai weru mea tourai, paria antonai waroi weru mea toninai ki, wape antoenemirongnei dohong we antosobu mea aha. Donio antorurai paria we antorarabera antoru antowati mea aha. <sup>18</sup> Antorurai tonanai we antorontai mau, tuti yau Paulusi, iruraifa tonanai we beiru tea ampa. Wape Samin-seni niari wedua antoru donio antorontai mau kaha. <sup>19</sup> Antoenemirongnei dohong weai tonanai, weo tarai, meroaso Kristusi wa wedaya antoenemitawanaifa tuti antomrarising. Weo rahidao tane Seng Yesus Kristusi daraberahi aha ma we fianduhi tata, tatoari na arongreafo mani, mea na jemati Tesalonika wa meaino mewedaya antoboi antoaromine. <sup>20</sup> Tarai, meaino metohona mani, antoboi antoaromi tuti antomrarising ne.

### 3

*Paulusi medu kariri rahidao denatu Timotiusi dontai wesa fo*

<sup>1</sup> Antoenemirong we antosobu mea ahera ne wedaya antoramang ahang kaha mae antohutuai

we aunayai na bendari Atena mae, <sup>2</sup> auranatu aune doroi Timotiusi we mea mau nanai. Timotiusi nini mani Allai ne mangfata manei dine, i yufi kontai ria auru we antowuwu Kaiwo Mahikai kariri Kristusi fo. Auranatui mau we fiata mea, ambori meparaise tuti mewemambiriu we meroaso kanggunai. <sup>3</sup> Ambori na tonana ne, na dadira rorong tasodaira ne, manei na mea wiro su to fui kaha. Mantaung mea mewaitawanaifa ampa weo dadira rorong tasodairi nani, Allai yoa weai ampa we tasodairi. <sup>4</sup> Rahida antonayai ria mea na nana wa, antorairiri kaririai we mea ampa, we ambori tasodai dadira ria inontarai siai ki. Tuti mantaung mea mewaitawanaifa ampa we finanai tarai kaririai ampa. <sup>5</sup> Aino wedaya yemang aha kaha mae yenatu Timotiusi we mea mau ninai, weo yohong weai paria we yeitawang kariri todoni mene meroasoawa. Weo imameataifa dohonao Saminseni weanggari mea sofa mea metau wei fe. Nana mani fi antorurai tutira ne tupa dawohi.

*Kaiwo mahikai Timotiusi kia aha ma kariri todoni jemati na Tesalonika fosa eroasoawa fo*

<sup>6</sup> Wape arahio Timotiusi daraberahi kawuru ria mea we auru ma ninai. I kia kaiwo mahikai kariri mene meroasoawa, tuti todoni menemiwawu inontarai siai wa. Deisaharai kontai kariri todoni mearomio antoru na menemirorong mirising tuti metohong we mewati antoru ne, ne tarai kariri antoru kontai antorohong weai paria we antowati meawa. <sup>7</sup> Ampafe donio, doroi meaine, na dadira rorong ne tuti na enari kanggani antoru ne, wiro wedaya antoenemirorongnei fituaya kaha, mae



antomirising. Weo kaiwo mahikai antotaramioai kariri meawa tuti kariri todoni meroaso Kristusi wa dohong antoenemirorongnei mitubaru aha. <sup>8</sup> Kaiwo ninai dohong antouremi tafa na yai tuti antomirising paria, weo meroaso kanggunai tuti metoaria mutu na Sengnei fefe. <sup>9</sup> Antowaitawang kariri antofaraise toa ne ahang kaha na antorohong mahikai we Allai ne, tutira fino mirising antonumiruinsoai kariri mea na Allai arongreafe ne. <sup>10</sup> Diru rahida antorutang we Allai paria, we antosobu rahida we antorontai mau antowati meuremiwa aha, ambori antofata mea na mene meroasoawa, ambori meroasoai na mai pari aha.

<sup>11</sup> Ninaia mani, kadono tane Dai Allai mantauni tuti tane Seng Yesusi urohong rang we antoru we antorontai antosobu mea aha. <sup>12</sup> Kadono Sempaisi wedaya mea menemiwawu wawera mea fuba aha tuti menemiwawu inontarai siai fuba aha, ne tarai toyari antoenemiwawu mea ne. <sup>13</sup> Na tonanane Sempaisi dohong emirorongwai mitubaru, ambori na Dai Allai arongreafo memararebanai tuti wiro metohong sarawa kaha, na rahida tane Seng Yesusi tuti ne wewai mararebanai rabuangfoi daraberahi nai ma fo.

## 4

*Fi kariri inontarai eroaso fosa todoni eminohi toa fo*

<sup>1</sup> Doroi meaine, kaiwo bitoya itoi kaririai kai ampa, wape yeo itoi fieai kontai aha. Na Seng Yesusi wonongne, antorutang mea na tapapa tuti antorangewa mea, we merurai mambiriu

aha we metohong kariri aunau raminde nanai mesobuai ria antoru, kariri todoni meminohi toa wa, ambori Allai firaise we mea. Tarai antowait-awanai we meminohi toa wa tonanai ampa, wape antorangewa mea weo metohong kaririai na mai pari aha. <sup>2</sup> Weo mewartawang kariri kaiwo ametemi mea wea fe na Seng Yesusi ne mambiriufu ampa.

<sup>3</sup> Weo fi Allai dawi weaifa we menari ne mani, menemirorongwai mirarebanai tuti mehatai weru maninawafoi kiai. <sup>4</sup> Nana mani mansiari-mansiari wau rurai we borara nemu taraiwai weru maninawafoi, boitawang weduari ambori murarebanai. <sup>5</sup> Dohonao maninawafoi tebung wedua uremuwara ambori amamuwa rirora funoma weaifa, kariri mano etaroanso Allai kaha fosa enarifo fe. <sup>6</sup> Tuti na fi tonina ne dohonao manei niari sasarifeai we ne doroi uroasoai ruhia foi fe, toyari enerorong dohong we ne doroi ne wiwingfoi ete ne mangfoi. Weo Sempaisi ambori dohong aibo we inontarai enari sasari tonana nesa ki, kariri fianai aino raminde antoraretawang mea weai ananai. <sup>7</sup> Allai sahu tatane wiwo we tamaninawa kaha, mae we tamararebanai tuti taminohi na mai. <sup>8</sup> Ampefe mandoni dino deiaya kaiwo aunau nina mani, wiwo deiaya inontaraine antoru kaha, mae deiaya Allai mano dohong Nuaninu Mirarebana foi we meawai wa.

<sup>9</sup> Yo, tuti kariri todoni menemiwawu mene doroi fosa fo, tarahio yeunau mea weai ahang kaha, weo mantaung mea mesobu aunau ria Allai kawuru ampa, kariri todoni menemiwawu wawera meawa. <sup>10</sup> Kasau ampa, we menemiwawu

mene doroi eroaso wasa kiai na nu Makedonia wai ampa. Tonanai ki, wape antoreyo antoranggewa mea aha we metohong kariri fininai na mai paria aha.

<sup>11</sup> Ne mai mani merurai we meminohi na mai ria inontarai siai, tuti wiwo mesoro kaiwo fanai. Meuremi maya we merufi we mesobu fiang ete doi we fiata mea nai. Menari tonanai kariri fianai aino raminde automadurai kawuru we meara wa. <sup>12</sup> Ampafe na tonana ne, wiwo menemitawang inontarai siai we efata mea kaha, tuti inontarai eroaso Allai kaha fosa ewati meminohi toa fo nanai etato mea.

*Fi kariri mano eroasoai emararehara fosa esobuai na rahida mansuwi-suwi fo*

<sup>13</sup> Doroi meaine, antorohong weai paria, we dohonao meserawawera kariri fifianai aino mene doroio emararehara fosa esobua fo, ambori wiwo menemirorong fituayai tuti mesai metaidu karrera fe kariri inontarai siaio wiwo enemitawang mansuwi-suwi kaha foi fe. <sup>14</sup> Weo tata mani taroasoai we Yesusi mireha tuti suwi kawuru ampa. Aino wedaya taroasoai kontai we Allai ambori duwi kaiwasa fuba eroaso Kristusi tuti emararehara fosa, we kiasara eminohi riati. <sup>15</sup> Kariri ne nanaifa mani, antoraikaririai we mea mau, we Sengnei mantauni ne aunau medura ne toninai, na rahida Seng Yesusi daraberahi ma foi mani, mano tatarang ne tata wiwo tane fafong tasobu Yesusi weru mano emarareha fosa kaha. <sup>16</sup> Weo na rahida bonani Seng Yesusi mantauni biari na rorafaisi meu, tuti sahu na raofuifo fiabai paria, kontai wewai mano dedai foi sahu,

tuti manei biui Allai ne songgerifoi. Tuti inontarai eroaso a fosa, mano emararehara fosa, Allai duwisa etoa fafong. <sup>17</sup> Akawuru wori, mano taminohi tatarang paria sobu rahida bonani, tahontaisa, Sengnei yuai tata ruhiai na kafafe rorong fo we tasobui na rorafaisi. Ainanaya taminohi riati wenumainu. <sup>18</sup> Ampafe metaunau wawera mea na kaiwo nanai ambori menemiro-rongwai mitubaru.

## 5

### *Mainenang we rahida Sengnei daraberahi aha ma fo*

<sup>1</sup> Doroi bohine meaine, tarahio wirosi isoi kaririai we mea aha mau kaha kariri rahida bodoni andino Sengnei daraberahi nai aha ma fo. <sup>2</sup> Weo mantaung mea mewartawanai ampa, weo rahida Sengnei daraberahi nai aha ma foi, da tantuma toyari we da we kiamananapi na diru rabuang, ampafe manei wirosi deitawana kaha. <sup>3</sup> Inontarai eroaso kaha fosa enemituaitaifa weo eminohi na mai ampa, wirosi esobu dadirafeai ete mamunafeai ahang kaha. Wape na rahida bonani faini esodai ne karirafoti eworu na tantuma ki. Finanai esodairai na tantuma paria, ne tarai toyari wiwinsanai amainafoti pirahai tantuma we deyo minohi. Tuti manei wirosi kiaharai weru ne karirana kaha.

<sup>4</sup> Wape doroi mea mani wirosi inontarai menayai na manantiti rorong fo di mea kaha, weo metaroanso Sempaisi fefe. Ambori rahida Sempaisi da aha ma foi, wirosi mesoi mea kaha, ne tarai toyari mananapio da tantuma ma fe.

<sup>5</sup> Mea kiai mani inontaraio menayai na Kristusi ne sambewara rorong fo di mea. Tuti tata mani wiro inontaraio tanayai na mamantiti rorong ne di tata kaha, ete arikang mamantiti di tata kaha, weo inontarai eroaso kaha fosa ansaino enai na mamantiti rorong fo ne. <sup>6</sup> Ampafe dohonao tatena kariri inontarai siai nanisa fe. Mae todoni kontaio tamainenang tatamang tuti tabiriu we tateiaya ne karirafo. <sup>7</sup> Weo diru wori kaiwasa etena ki, tuti mano emayeru biriu nesa kontai diru wori etunung ye emayeru ki, wiro emainenang etanansiau kaha. <sup>8</sup> Wape tata mani inontaraio tanayai na rahidafo di tata, amani na sambewarai rorong fo. Ampafe tateiaya ne mai kaha fo. Taroaso Sempaisi mutu tuti taenemiwawu inontarai siai, ambori tawemambiriu we tatoaria mutu. Nana mani tane tarai toyari afai mamunao sensuni na ansung besi ambori doaria mutu ma mamuna rorong fo. Kontai toyari afai mamuna foi we sata ne sapewi besi foi we weduari fo, tata kontai taenemitawanaia mutu we Allai ambori feriri tata ki. Fininai ne tarai toyari sapewi besi we wedua tata weru ne mai kaha fo.

<sup>9</sup> Weo Allai wiro yuai tata we ambori tasobu aiboifo kaha, mae we feriri tata na tane Seng Yesus Kristusi. <sup>10</sup> I mireha we tata ambori na rahida daraberahi nai aha ma fo mani, rabuang bonani tamarareha kawurua ete, tatarang te, taminohi riati. <sup>11</sup> Ampafe metaunau wawera mea tuti mefata wawera mea, kariri fianai aino menari kawurua nanai, ambori menemirorong mitubaru aha.

*Kaiwo aunau wefuiai*

<sup>12</sup> Doroi meaine, antorutang mea we metato mano erurai paria we erufi bitoya we mea fosa, amani ewiwiaing mea na Sempaisi tuti esua mea we menari fi mai fo. <sup>13</sup> Metatosa we inontaraio atosa disa, tuti menemiwawusa paria weo fi eru we mea wa. Meminohi na mai tuti meweboyari. <sup>14</sup> Antoranggewa mea kontai we, mesua mano ewata etena funoma fosa ambori erufi, metaunau mano enemimameata fosa ambori enemitawanai, tuti mefata inontaraio eroa-soa mutu kaha fosa. Memanang we mandoni kontai. <sup>15</sup> Metanansiau, manei dapa mane wau mani, bapai ahang fanai, mae meruraifa we menari ne bengfo we mea tuti we mandoni kontai.

<sup>16-18</sup> Inontarai meweboyari ria Kristus Yesusi di mea, donio na todoni feai kontai memararising pampang, tuti mewenadi pampang. Na fifiani kontai metohong mahikai we Sempaisi pampang, weo nanai aino Allai dawi weaifa ria mea we menari ne.

<sup>19</sup> Dohonao meteiyaya fio Nuaninu Mirarebanai foi niari fo fe. <sup>20</sup> Dohonao mesahu tawang kaiwo Nuaninu Mirarebana nei dohonai we mea wa fe. <sup>21</sup> Kaiwoariri fuba metaramioa fo, metitua weaifa, we kaiwofo tarai na Allai ete bireri e. Ambori ne wetarai na Allai fo aino merutawanai. <sup>22</sup> Mehatai weru fi mai kaha fo kiai.

### *Kaiwo kafe*

<sup>23</sup> Kadono Allai mantauni, mano dohong tata tanumiruainso ne maifo, niari menemirorongwai mirarebanai.

Kadono deitawang wedua mea paria, ambori na fi menemirorong dohong wea fo, fi menemituaita fo, tuti fi menari fo, wiwo manei dohong

sarawa kaha, pariao rahida tane Seng Yesus Kristusi daraberahi aha ma fo. <sup>24</sup> Allai niari kariri finana rai, weo i sahu mea kawuru ampa we merariati fefe, tuti fianai aino medura fo dohong kaririai.

<sup>25</sup> Doroi meaine, mewenadi we antoru kontai.

<sup>26</sup> Metaikaririai we tane doroiwasa we antoen-emiwawusa tuti antoranatu ene mahikaifea.

<sup>27</sup> Na Sempaisi wonongne, yutang mea na tapapa we metato kaiwo anatu nini we tane doroio eroaso wasa kiai.

<sup>28</sup> Kadono tane Seng Yesus Kristusi dohong ne bengfo arora we mea.

## **Sempaisi Ne Kaiwo Mirarebanai New Testament in Ambai**

copyright © 2010 Wycliffe Bible Translators, Inc.

Language: Ambai

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Ambai

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a4b461f1-cd72-5074-9be0-b39efea15ceb